

## خصام



خلينا نتخاصم كمان

خليني احسنّ بلهفتك

وسط العتاب...

وسط الكلام...

خليني احسنّ بفرحتك

كل اما نرجع م الخصام

واشوف حلاوة بسمتك

لو امدّ ايدي بالسلام

عارفك طريق فرد الجناح

على سكتي شبه الحمام

عارفاني على حجرك كبرت

ما بقيتش اخاف غير م الفطام

عارفك حياة...

حلمي اللي عايش باحلمه

دايمًا باشوفه في المنام

عارفاني من قلبك شربت

ومليت عروقي بالغرام

قلبي الصغير بيعشقتك

خطوة زمن وسع البراح

عشقتك آدان...

صحاني أشكر ربنا

وأفرد لبابه ١٠٠ جناح

سامع نداك ودقتك

على باب سنيني اللي ابتدت

شبه الصباح...

لما بيحضن بالدفا قلب النهار

عشقك طيور...

صبحت تزوق عشها بورد وخضار

تغزل أمل يرقص

على فروع الشجر

وتغني غنوة الانتصار

على كل أوجاع الهوا

نخطي سوا

عشقك دوا...

لو قلبي صابه الانكسار

عشقك مدد

أنا شلته للأيام

عشقك سند

وركنت ضهري عليه

عشقك كما الأحلام

أصحى وانام الاقيه

...

شوف يا عشق...

آخر كلام هاكتبه:

هازرع غيطاني شوق

وارسم حيطاني شجر

وفروعه طالعة لفوق

يطلق بخور للسما

ينزل مطر

يكسر حجارة الطوق

وانا وانتِ نسجد سوا  
حامدين مجيب القدر  
وزماننا لما يروق  
وما عادش بيننا خصام  
ما انا أصلي حاسس لهفتك  
في حروف آخرها كلام  
باقراه في عينك إنما  
يشبه لعيني تمام